

Na osnovu čl. 12. stav (1), tačka a) i 18. tačka b) Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01 i 28/04), Skupština Kantona Sarajevo, na sjednici održanoj 30. januara 2008. godine, donijela je

## ZAKON

### O IZMJENAMA I DOPUNAMA ZAKONA O POLICIJSKIM SLUŽBENICIMA KANTONA SARAJEVO

#### Član 1.

U Zakonu o policijskim službenicima Kantona Sarajevo ("Službene novine Kantona Sarajevo", broj 25/06), u članu 38. stav (1) tačka a) iza riječi "funkcije" dodaju se riječi: "izuzev u slučajevima utvrđenim ovim Zakonom".

#### Član 2.

Iza člana 38. dodaje se član 38a koji glasi:

#### "Član 38a

(Policijski službenik imenovan na javnu funkciju u izvršnim organima sigurnosti)

(1) Policijskom službeniku izabranom na javnu funkciju u izvršnim organima sigurnosti na bilo kojem nivou vlasti u Bosni i Hercegovini, prava i obaveze iz radnog odnosa, na njegov zahtjev, miruju od momenta izbora na javnu funkciju.

(2) Policijski službenik iz stava (1) ovog člana, vraća se u policijski organ najkasnije u roku od šest mjeseci nakon što je njegova javna funkcija u izvršnom organu sigurnosti prestala u isti čin koji je imao prije izbora na javnu funkciju.

(3) Ukoliko je policijski službenik iz stava (1) ovog člana preuzeo javnu funkciju u izvršnom organu sigurnosti prije stupanja na snagu ovog Zakona, dodijeliće mu se čin u skladu sa članom 128. ovog Zakona, nakon povratka u policijski organ."

#### Član 3.

U članu 46. stav (1), tačka h), briše se.

#### Član 4.

U članu 86. tačka b) procenat "0,5%" zamjenjuje se procentom "0,6%".

#### Član 5.

U članu 129. dodaju se novi st. (7) i (8) koji glase:

(7) Izuzetno od stava (4) ovog člana, policijski službenici sa završenom srednjom stručnom spremom (IV stepen) kojima je u skladu sa ranijim propisima dodijeljen čin mlađi inspektor i čin inspektor zadržavaju te činove u periodu ne dužem od tri godine od stupanja na snagu ovog Zakona.

(8) Ukoliko policijski službenik iz stava (7) ovog člana u propisanom roku ne ispuni uvjet u pogledu stručne spreme dodjeljuje mu se čin u skladu sa odredbama člana 128. Zakona.

#### Član 6.

U članu 130. stav (1) broj "2007." zamjenjuje se brojem "2008.".

#### Član 7.

Član 135. mijenja se i glasi:

#### "Član 135.

(1) Ukoliko ovim Zakonom nije drugačije propisano i u skladu sa međunarodnim obavezama Bosne i Hercegovine, nijedna osoba, ni pod kojim okolnostima, ne može biti u radnom odnosu po osnovu ovog zakona, ako su joj Međunarodne policijske snage Ujedinjenih naroda (u daljnjem tekstu: "UN/IPTF") odbile certifikaciju ili joj je UN/IPTF ukinuo ovlaštenje za vršenje policijskih ovlaštenja.

(2) Ukoliko ovim Zakonom nije drugačije propisano, u skladu sa međunarodnim obavezama Bosne i Hercegovine i pored osnova koji su propisani ovim Zakonom u pogledu prekida radnog odnosa policijskog službenika, radni odnos policijskog službenika prekida se i ne produžava ni u kom obliku, niti na bilo koji način, i ni pod kojim okolnostima, ako je policijskom službeniku UN/IPTF odbio certifikaciju, odnosno ako mu je UN/IPTF ukinuo ovlaštenje za vršenje policijskih ovlaštenja.

(3) Stavovi (1) i (2) ovog člana ne primjenjuju se na osobe kojima je UN/IPTF odbio certifikaciju a koje je u skladu sa odredbama ovog Zakona biti zaposlene u policijskom organu nakon stupanja na snagu ovog Zakona o izmjenama i dopunama Zakona o policijskim službenicima Kantona Sarajevo.

(4) Osobe iz stava (3) ovog člana izuzimaju se od primjene člana 46. tačke b) ovog Zakona.

(5) Da bi se smatrala "osobom kojoj je UN/IPTF odbio certifikaciju" u smislu odredbe stava (3) ovog člana, osoba je u vrijeme podnošenja prijave za prijem u radni odnos dužna iznijeti činjenicu o tome da joj je UN/IPTF odbio certifikaciju.

(6) Iznošenje činjenice iz stava (5) ovog člana smatra se "traženom dokumentacijom" u smislu odredbe iz stava (1) člana 51. ovog Zakona. Navedena činjenica iznosi se:

a) u pismenoj formi i

b) uz nju se podnosi primjerak relevantnog dokumenta UN/IPTF-a kojim se potvrđuje odbijanje certifikacije."

Član 8.

Ovlašćuje se Zakonodavno-pravna komisija Skupštine Kantona Sarajevo da utvrdi prečišćeni tekst Zakona o policijskim službenicima Kantona Sarajevo.

Član 9.

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".

---

Broj 01-02-2767/08  
30. januara 2008. godine  
Sarajevo

---

Predsjedavajući  
Skupštine Kantona Sarajevo  
dr. **Denis Zvizdić**, s. r.